



Nuuk, d. 13. juli 2015

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga:

### Apeqqutit:

- 1) Nunap tamakkiisumik akiitsuinut tunngatillugu taarsigassarsinermi akiitsuinut aningaasaliisarnermullu periusissiaq Naalakkersuisunit 2012-imi suliarineqartoq Naalakkersuisunit malinneqarnialersarpa?
- 2) Taarsigassarsinermi akiitsuinut aningaasaliisarnermullu periusissiaq atuuttoq malinniarneqanngippat, taava akiitsuinut aningaasaliisarnermullu ingerlassaasinnaasunut aallaaviit suut Naalakkersuisunit malinniarneqarpat?
- 3) Ukiامت Inatsisartut ataatsimiilerpata Naalakkersuisut missingersuusiornermut inatsimmik nutaamik saqqummiussiniarpat, taamaassappallu akiitsuinut aningaasaliisarnermullu ingerlassanut aqutsineq allannguuteqartinneqassava?
- 4) Aappiuppat, allannguutit suut siunnersuutigineqarniarpat?

(Inatsisartuni ilaasortaq, Sara Olsvig, Inuit Ataqatigiit)

### Tunngavilersuut:

2012-imi Naalakkersuisut taarsigassarsinermi akiitsuinut aningaasaliisarnermullu periusissiamik saqqummiussaqqarput, taannalu kingorna Namminersorlutik Oqartussat, kommunit ingerlatsiviillu namminersorlutik oqartussanit pigineqartut akiitsuinut tunngatillugu aalajangiisarnernut tunngavigineqarpoq.

Inuit Ataqatigiinniit isumaqarpugut taarsigassarsinermi akiitsuinut aningaasaliisarnermullu periusissiami mianersornissamik tunngavigisap malinneqarnissaa pingaaruteqartoq. Tassa Kalaallit Nunaata sapinngisamik nukittuumik pertujaatsumillu aningaasaqarnissaa qulakkeerumallutigu.

Ukiuni makkunani Kalaallit Nunaat aningaasatigut ilungersunartorsiorfiuvoq, suliffissaaleqineq annertuvoq sanaartukkanillu pisariaqartunik piffissamilu sivisuumi attanneqarsinnaasunik pisariaqartitsinerput paasisimavarput.

Aningaasanut Naalakkersuisup 2015-imut Aningaasaqarnikkut ingerlatsineq pillugu Nalunaarusiami taarsigassarsinermi akiitsuinut aningaasaliisarnermullu periusissiaq atuuttoq erseqqisarpaa imalu allalluni "aningaasaliissutit pisortatigoortut attartornerillu qanoq suliarineqarneranni" (*nam. nutsigaq*) periusissiaq suli atuutissasoq. Nalunaarusiamittaaq tassani Naalakkersuisoq allappoq "taamaattumik Aningaasanut Naalakkersuisoqarfik missingersuutit pillugit inatsit maanna atuuttoq missingersuutininik ataqatigiissaarinissamut aningaasaqarnermillu aqutsinissamut pitsaanerusunik atugassaqqartitsilersillugu Aningaasaqarnermut Naalakkersuisoqarfiup annertuumik nutarterneqarnissaa piareersarpaa. Nutarterinerup ilaatigut kingunerisaanik

missingersuusiormi inatsit pisortani ingerlataqarfinni tamani, kommunit ilanngullugit, atuuttussanngortinneqassaaq, Inatsisartut aqqutigalugit aningaasartuutitut ukiunut arlalinnut sinaakkutissaliinikkut illersorneqarsinnaasumik aningaasaqarnikkut ingerlatsinerup qulakkeerneqarnissaanut iluaqutaalluni, taarsigassarsinerit passunnerinut aamma ingerlataqarfiit akornanni pitsaanerusumik missingersuutitigut ataqatigiissaarisoqarnissaa qulakkeerneqarluni.”

Kingornali sanaartugassanut taarsigassarsinernullu pingaarnersiunerit taarsigassarsinermi akiitsunut aningaasaliisarnermullu periusissiamik aallaaveqassanersut erseqqarinngilaq. Ilaatigullu pingasunngornikkut apeqqarissaarfimmi Naalakkersuisut Siulittaasuannut apeqqutigaara sanaartugassanut pilersaarutigineqartorpassuarnut Naalakkersuisuniillu qaammatini kingullerni eqqartorneqartunut atatillugu taarsigassarsinermi akiitsunut aningaasaliisarnermullu periusissiaq aallaavigineqarniarnersoq. Tamanna erseqqissumik akineqanngilaq.

Taamaattumik maanna apeqquteqarnitsigut Naalakkersuisut matumani politikkiat paasisaqarfigerusupparput.

Apeqqutima ullut suliffiusut qulit iluanni Naalakkersuisunit akineqarnissaat kissaatigivara.